

## **Asrayman yurtim**

Ota desam, otamdayin bag`ri kengimsan,  
Ona desam, quyoshlarga mehri tengimsan.  
Yuragida yolqini bor akamsan o`zing,  
Kulgichlari yarashiqli munis singlimsan.

Naqarot:

Qayda bo`lsam senda ko`nglim sog`inib yurdim,  
Ardoqlayman, avaylayman, asrayman yurtim.

Zumrad-zumrad suvlaringdan ichganlarim bor,  
Shudring sohib maysazoring kechganlarim bor.  
Temurbek deb Ulug`toqqa suyanganlarim,  
Ulug`bek deb samolarni quchganlarim bor.

Qayda bo`lsam senda ko`nglim sog`inib yurdim,  
Ardoqlayman, avaylayman, asrayman yurtim.

Beshik bo`ynin achomlagan ko`zmunchog`imsan,  
Asal hidi kelib turgan saxiy bog`imsan.  
Xazinamsan o`n sakkiz ming olamdan ortiq,  
Talpinganim, topinganim – sajdagohimsan.

Qayda bo`lsam senda ko`nglim sog`inib yurdim,  
Ardoqlayman, avaylayman, asrayman yurtim.

## **Askar xati**

Salom, Ona, onajonginam!  
Yana sizga yozmoqdaman xat.  
Salomatmi aziz otam ham,  
Ukalarim yurgandir xushbaxt!

Boshim uzra yulduz charog`on,  
Chegarada turibman sergak.  
Yurt bo`lsin deb tinch va farovon,  
Doim bedor uradi yurak.

Askar bo`lib ulg`aydim bugun,  
Ona Vatan nedir, angladim.  
Jonim fido el-u yurt uchun,  
Mard yigitlar yo`lin tanladim.

Onajonim, onajonginam,  
Sizga mehrim tilagimda jam.  
Qutlug` bo`lsin, muborak bo`lsin,  
Eng ulug` va eng aziz bayram!

Xayr Ona, xayr onajon,  
Doimo tinch bo`lsin ko`nglingiz  
Va baxtinga bo`ling sog`-omon!  
Salom bilan askar o`g`lingiz!

## **Shu aziz Vatan barchamizniki**

Qancha dovondan o`tdik,  
Dasht-u yobondan o`tdik.  
O`tdik baland-pastlardan,  
Yaxshi-yomondan o`tdik.

Sinashta bo`ldik, do`stim,  
Yurt qadrin bildik, do`stim.  
Kamol berdi ozodlik,  
Qudratga to`ldik, do`stim.

Ulug` ayyom – qutlug` to`y,  
Balog`at taratar bo`y.  
Kelajakni o`ylasang,  
O`tgan kuning eslab qo`y.

Xudo berdi bu yurtga,  
Daho berdi bu yurtga.  
Sohibqiron vorisi  
Ziyo berdi bu yurtga.

O`zbekiston – baxtimiz,  
G`ururlansak haqlimiz.  
Eng buyuk boyligimiz –  
Shu bunyodkor xalqimiz.

Sohibqiron beshigi,  
Ilm-u urfon beshigi.  
Bizga istiqlol bergan  
Buyuk inson beshigi.

Navoiylar ajdoding,  
Buxoriylar ajdoding.  
Yurt uchun jonin tikkan  
Fidoyilar ajdoding.

Elim, degan o`zgaydir,  
O`zim, degan to`zgaydir.  
Yulduzlarni ko`zlagan  
Yulduz qadar o`sgaydir.

Birlashadi bo`lar el,  
Qo`lni qo`lga bergin, kel.  
Vatan uchun yashaylik,  
Shijoatdan bog`lab bel!

O`rgan hunar, fan qilgil,  
Fikringni chaman qilgil.  
Tafakkurni charxlagil,  
Ko`nglingni Vatan qilgil.

Tu`roq osti ham boylik,  
Tu`roq usti ham boylik.  
Qadrin bilib ardoqla,  
Quchog`ingda jam boylik.

Oshno bilgil mehnatni,  
Dushman tutgil g`aflatni.  
Ona deb bil Vatanni,  
Ota deb bil millatni.

Zamonning shiddatin ko`r,  
G`ofilning qismatin ko`r.  
Xalq bo`lib yeng shimargan  
Insonning izzatin ko`r.

Qurgin, yaratgin, yurtdosh,  
Yog`du taratgin, yurtdosh.  
O`zin tanigan elga  
Yordir Yaratgan, yurtdosh.

Kelbatingda viqor bor,  
G`urur va iftixor bor.  
Ishonch bor senga do`stim,  
Eng oliy e`tibor bor.

Elman degan, el bo`lar,  
Erman degan, yer bo`lar.  
G`oliblikni istagan  
Birlashadi, bir bo`lar.

Yurtimiz ozod, do`stim,  
Ozod-u obod, do`stim.  
Imkonimiz bor ekan,  
Bog`laylik qanot, do`stim.

Oylar aylanar shitob,  
Bir lahza to`xta shu tob.  
Savob ish qildimmi, deb,  
O`zingga bergil hisob.

Daryo bo`lib jo`sh endi,  
Shavqqa to`lib jo`sh endi.  
Ulush olgansan, sen ham  
O`z hissangni qo`sh endi.

Bizlarga meros Vatan,  
Topgaydir e`zoz Vatan.  
Bizdan qolsin ertaga  
Go`zal, beqiyos Vatan.

*Naqarot:*

*Shu chaman,  
Shu gulshan,  
Shu maskan,  
Shu Vatan,  
Shu aziz Vatan  
barchamizniki!*

## Aytgil, do`stim

Boshing egib, ta'zim ayla, shukrona ayt,  
Seni guldek erkalagan chaman uchun.  
Osmonlarda yurgan bo`lsang, tuproqqa qayt,  
Aytgil, do`stim, nima qildik Vatan uchun?

Ko`zi qora, yuragi oq shu el uchun,  
Tuproq uchun, shu yurt uchun, chaman uchun,  
Ulug` inson boshlab bergan shu yo`l uchun,  
Aytgil, do`stim, nima qildik Vatan uchun?

Eldan ketib, el bo`lganni kim biladi?  
Don axtargan go`shtxo`rlarga yem bo`ladi.  
Dil qonasa, ona tuproq em bo`ladi,  
Aytgil, do`stim, nima qildik Vatan uchun?

Qachongacha qorning o`ylab o`tadirsan?  
Qachongacha ko`kdan chalpak kutadirsan?  
Axir, Vatan bitta, sen ham bittadirsan,  
Aytgil, do`stim, nima qildik Vatan uchun?

Buncha bino qo`yma zarrin choponlarga,  
Saratonda yaproq bo`lgin dehqonlarga,  
Suyangani tayoq bo`lgin cho`ponlarga,  
Aytgil, do`stim, nima qildik Vatan uchun?

Hech kimdan kam emassan, kam bo`lmagaysan,  
Erda qolsang, oftob bo`lib kulmagaysan.  
Qachon belni mahkam tortib bog`lagaysan?  
Aytgil, do`stim, nima qildik Vatan uchun?

Shu soylardan suvlar urgin yuzingga sen,  
Bir bor nazar solgin bosgan izingga sen,  
Shu savolni berib ko`rgin o`zingga sen,  
Aytgil, do`stim, nima qildik Vatan uchun?

## Qo`shiq

Olisdagi mahmadana, ey eski olchoq,  
Menga qadam tashlamoqni o`rgatmagin sen!  
O`zingga boq, keyin, mayli, nog`orangni qoq,  
Menga qanday yashamoqni o`rgatmagin sen!

Tinchlik deya yurak bag`ri kuyik eldir bu,  
Yaratganning qoshida eng suyuk eldir bu,  
O`tmishi ham, ertasi ham buyuk eldir bu,  
Menga qanday yashamoqni o`rgatmagin sen!

Dala – dashtlar o`z-o`zidan Eram bo`lmagay,  
Lekin sendan beminnat bir karam bo`lmagay,  
O`zbek eli hech kimsaga qaram bo`lmagay,  
Menga qanday yashamoqni o`rgatmagin sen!

Kitobingda daholarim so`zlari bordir,  
Devoringda bobolarim izlari bordir,  
Mag`rur elning et-u tirnoq do`stlari bordir,  
Menga qanday yashamoqni o`rgatmagin sen!

Yaltiragan hamma narsa emas tilla, hey,  
Hayfdir senga Naqshbanddan qolgan salla, hey,  
Ey xudoni tanimagan chalamulla, hey,  
Menga qanday yashamoqni o`rgatmagin sen!

Hali baland dovonlarga ot qo`yadirman,  
Kerak bo`lsa osmonlarga ot qo`yadirman,  
Loqaydlig-u nodonlikka o`t qo`yadirman,  
Menga qanday yashamoqni o`rgatmagin sen!

*Agar jannat ko`kda bo`lsa,  
ostidadir O`zbekiston,  
Agar jannat yerda bo`lsa,  
ustidadir O`zbekiston!*

## Shukrona

H-ey, yoronlar-ey!  
Bulbul dilim sayrab turar,  
Jismi jonim yayrab turar,  
Shukronalar aylab turar  
Shunday zamonlarni ko`rib,  
Davr-u davronlarni ko`rib.

Nega g`ururga to`lmayin,  
Tuproq`imdan o`rgilmayin,  
Yuksalgan osmonlar sayin  
Tog`dek xirmonlarni ko`rib,  
Usta dehqonlarni ko`rib.

Oshiq yurak jo`shib ketar,  
Mendan oldin shoshib ketar.  
Qirg`og`idan toshib ketar  
Qoshi kamonlarni ko`rib,  
Mohi tobonlarni ko`rib.

Yigirmaga kirgan ukam,  
Sen hech kimdan emassan kam.  
Navqironman bugun men ham  
Sendek o`g`lonlarni ko`rib,  
Mardi maydonlarni ko`rib.

Yurt yashnasa, yashnayman-da,  
Yurt ishq bor jonu tanda.  
Zavqqa to`lib kulayman-da  
Asl insonlarni ko`rib,  
Aziz mehmonlarni ko`rib.



## Oydan tushgan emas

Hech kimni baxt o`z-o`zidan quchgan emas,  
Qush ham ko`kka mashaqqatsiz uchgan emas.  
Oydin tunlar, osoyishta, tiniq tonglar  
Oydan tushgan emas, ko`kdan tushgan emas.

Mevasin yeb, bog`ini ham so`rab qo`ygin,  
Kerak bo`lsa, bog` atrofing o`rab qo`ygin.  
Nihollarning kokillarini tarab qo`ygin,  
Ozodlik ham, obodlik ham o`zi kelmas,  
Oydan tushgan emas, ko`kdan tushgan emas.

Bu binolar qaydan bino bo`ldi ekan?  
Kim bobolar qaddin raso qildi ekan?  
Nechuk bizni bugun dunyo bildi ekan?  
Ozodlik ham, obodlik ham o`zi kelmas,  
Oydan tushgan emas, ko`kdan tushgan emas.

Ertaklarda mo`hjizalar sehr sabab,  
Gulu giyoh ko`kargaydir mehr sabab.  
Tafakkurning huriligiga nedir sabab?  
Ozodlik ham, obodlik ham o`zi kelmas,  
Oydan tushgan emas, ko`kdan tushgan emas.

O`n sakkizga kirgan yigit so`ziga boq,  
Yuziga boq, olov yongan ko`ziga boq.  
Bu eng buyuk xazinadir, do`stim, biroq  
Ozodlik ham, obodlik ham o`zi kelmas,  
Oydan tushgan emas, ko`kdan tushgan emas.

Shijoatning, jasoratning mahsuli bu,  
Irodaning, zakovatning mahsuli bu,  
Ulug` Inson tanlab olgan haq yo`li bu,  
O`zbekiston, bundayin baxt o`zi kelmas,  
Oydan tushgan emas, ko`kdan tushgan emas.

## **O`zbekiston, yolg`izim!**

O`zbekiston, onajonim, yolg`izim,  
Bobolarim kaftidagi yulduzim,  
Jannatlardan suvlar ichgan ildizim,  
Jannat makonim mening, O`zbekiston,  
Jon ichra jonim mening, O`zbekiston!

Samandarsan – olovlardan sog` chiqqan,  
Buzrukvorsan – yetti o`g`li shoh chiqqan,  
Alpomishsan – ko`ksidan chaqmoq chiqqan,  
O`lmas dostonim mening, O`zbekiston,  
Jon ichra jonim mening, O`zbekiston!

Yalpiz atrin bilmas dehqon bo`lgaymi?  
Tinchlik qadrin bilmas o`g`lon bo`lgaymi?  
Yurtin sevmas odam inson bo`lgaymi?  
Nuri iymonim mening, O`zbekiston,  
Jon ichra jonim mening, O`zbekiston!

Necha asr ko`z yoshlarin yutgan el,  
Sohibqiron qaytishini kutgan el,  
Yurtboshini suyib, boshda tutgan el,  
O`zbekistonim mening, O`zbekiston,  
Jon ichra jonim mening, O`zbekiston!

## Ona tuproq

Avliyolar, daholarning beshigisan,  
Naqshbandlar topgan jannat eshigisan.  
Tiriklikning navosi ham qo`shig`isan –  
Sen azizsan, muqaddassan, ey sajdagoh,  
O`zbekiston, ota makon, ona tuproq!

Yuragimda tulporlaring dukurlari,  
Qaysi yurtning bordir buyuk Temurlari?  
Olovlardan omon chiqqan Semurg`lari,  
Sen azizsan, muqaddassan, ey sajdagoh,  
O`zbekiston, ota makon, ona tuproq!

Kimlarningdir ko`kragida tumor bo`lding,  
Kimlarningdir kiprigida g`ubor bo`lding,  
Gohida mard bir o`g`longa xumor bo`lding,  
Sen azizsan, muqaddassan, ey sajdagoh,  
O`zbekiston, ota makon, ona tuproq!

Asl farzand merosiga posbon bo`lgay,  
Ozod elning orzulari osmon bo`lgay,  
Bobolarim ismin aytsam doston bo`lgay,  
Sen azizsan, muqaddassan, ey sajdagoh,  
O`zbekiston, ota makon, ona tuproq!

Ota uyin farog`atin bilmaganlar –  
Ikkisi bir, biri ikki bo`lmaganlar,  
Tuproqtegi bo`lib zor-zor yig`laganlar...  
Sen azizsan, muqaddassan, ey sajdagoh,  
O`zbekiston, ota makon, ona tuproq!

Daryolarning izlarida daryo bo`lgay,  
Daholarning avlodi ham daho bo`lgay!  
Fido bo`lsa, shu Vatanga fido bo`lgay,  
Fido bo`lsa, shu Vatanga fido bo`lgay:  
O`zbekiston, ota makon, ona tuproq!

## **Bu muqaddas Vatanda azizdir inson**

Yurtlar bor – odamzot gul umri xazon,  
Insonning qadri ham qiymati arzon.  
Bu aziz zaminda inson mukarram,  
Bu muqaddas Vatanda azizdir inson.

Vatan kengdir elning bag`ri keng uchun,  
Yurtboshining mehri quyoshga teng uchun.  
Bu imkon, bu zamon senu men uchun,  
Bu muqaddas Vatanda azizdir inson.

Birovlar g`amidan ko`zlarida yosh,  
Suyangani – umid, tayanchi – bardosh.  
Ezgulikka yo`ldosh, yaxshiga qardosh,  
Bu muqaddas Vatanda azizdir inson.

Savob deb sahroda sardoba qurgan,  
Non yopsa, qo`shniga ilinib turgan.  
Nondek aziz, suvdek seroblik ko`rgan.  
Bu muqaddas Vatanda azizdir inson.

Nomardlar qahridan charchadi jahon,  
Nokaslar zahridan charchadi jahon.  
O`zingni tut inson,  
ko`zingni och, inson,  
Bu muqaddas Vatanda azizdir inson.

Bu qutlug` maskanda pirlar yotibdi,  
Dunyoni lol etgan sirlar yotibdi.  
Arslonlar yotibdi, sherlar yotibdi,  
Bu muqaddas Vatanda azizdir inson.

Tuprog`i to`tiyo makonga qulluq,  
Xudo bergan davr-u davronga qulluq.  
Aziz qilgan aziz insonga qulluq,  
Bu muqaddas Vatanda azizdir inson.

## **Avval keling, ko`ring O`zbekistonni**

Yiroqlarda do`ndirasiz yolg`onni,  
Uchirasiz, qo`ndirasiz yolg`onni.  
Ey, to`nini chappa kiygan janoblar,  
Avval keling, ko`ring O`zbekistonni.

Man-man deya ko`ksingizga uribsiz,  
Tog` deb o`ylab, yaydoq qirda yuribsiz,  
Abu Rayhon topgan yerda yuribsiz,  
Avval keling, ko`ring O`zbekistonni.

Ma`naviyat ummonida dur terdik,  
Mayoq bo`lib yo`lsizlarga yo`l berdik,  
Muhtoj qolgan g`animga ham qo`l berdik,  
Avval keling, ko`ring O`zbekistonni.

Tarixlarga savol har bir binosi,  
Har qadamda dahosi, avliyosi,  
Dardingizni olar Ibn Sinosi,  
Avval keling, ko`ring O`zbekistonni.

Otang bozor, onang bozor deydilar,  
Kimlar uchun bozor – mozor deydilar,  
Bekorchidan xudo bezor deydilar,  
Avval keling, ko`ring O`zbekistonni.

Gullayotgan, o`sayotgan eldir bu,  
Zulmat yo`lin to`sayotgan eldir bu,  
Inson nomin bezayotgan eldir bu,  
Avval keling, ko`ring O`zbekistonni.

## Yagonasan

Tuprog`ingda daholar xoki,  
Ul sohibi dunyolar xoki.  
Bobolarki, ulug` chinordek,  
Momolarki, Qutlug` Nigordek.  
Chinorlarki, beshiklar bo`lgan,  
Kelajakka eshiklar bo`lgan.  
Sen onasan, muqaddas Vatan!  
Yagonasan, muqaddas Vatan!

Xazinamsan, taxtim o`zingsan,  
Qiyosi yo`q baxtim o`zingsan.  
Er yuzining jannati sensan,  
Yaratganning san`ati sensan.  
Jannatbog`im, hazrattog`imsan,  
Mehrobimsan, sajdagohimsan.  
Sen onasan, muqaddas Vatan!  
Yagonasan, muqaddas Vatan!

Manglaydagi Durri Akbarim,  
Ne ko`zlarni olgan gavharim.  
Qora niyat, g`araz so`zlardan  
Asragaymiz yomon ko`zlardan.  
Ko`ksim ichra yuragim – tumor,  
Bu tumorda qutlug` noming bor.  
Sen onasan, muqaddas Vatan!  
Yagonasan, muqaddas Vatan!

## O`zbek o`g`li

Ikki daryo o`rtasi – keng dasturxon,  
Tuz totgansan, tuzlig`ingni unutma.  
Dasturxonni belbog` qilib o`stirgan,  
O`zbek o`g`li, o`zligingni unutma!

Sadarayhon bukilgani – so`lgani,  
Er yigitning egilgani – o`lgani.  
Yo`l bermagil dushmanlarga kulgani,  
O`zbek o`g`li, o`zligingni unutma!

O`zbek desam, jaranglagan tor kelur,  
Undan oldin nomus ila or kelur.  
Burgut kelur, lochin kelur, sor kelur,  
O`zbek o`g`li, o`zligingni unutma!

Unutmagil nasabingni, zotingni,  
Umid bilan otang qo`ygan otingni.  
Asra erta kuningni – zuryodingni,  
O`zbek o`g`li, o`zligingni unutma!

Bo`shamasin zinhor yog`och beshiging,  
Qulf ko`rmasin darvoza-yu eshiging.  
Yig`ilmasin supadagi to`shaging,  
O`zbek o`g`li, o`zligingni unutma!

Ko`pga kelgan kulfatlarga chap berma,  
Mahmadana maynalarga gap berma.  
Ko`ngil obod bo`lsin, sirtga zeb berma,  
O`zbek o`g`li, o`zligingni unutma!

Nochor qolsang nokas qo`lini tutma,  
Arslonsan-ku tulki yo`lini tutma.  
O`zingdan o`zgan marhamat kutma,  
O`zbek o`g`li, o`zligingni unutma!

## Yurt qo`shig`i

Bobomning bayti bor yaproqlaringda,  
Momomning tafti bor chorbog`laringda.  
Onamni eslatar rayhoning, yurtim,  
Dadamning hidi bor tuproqlaringda.

So`lim Xonoboddan Kiyiksoygacha,  
Qutlug` ostonadan suyuk oygacha,  
Chiroqlar yulduzdek porlar har kecha,  
Mudom o`t gurlasin o`choqlaringda!

Tog`laring bag`rida limmo-lim tilsim,  
Ming yilkim, mo`ysafid Shohimardon jim.  
Sangardak qo`shig`in sharhlay olar kim?!  
Tillo qumlar o`ynar buloqlaringda!

Mavlono Lutfiylar ulfatdir menga,  
She`r lutfi eng totli suhbatdir menga.  
Ulug`lar ismi ham quvvatdir menga,  
Tug`yonim – o`ynoqi toychoqlaringda.

Bir kuychi o`g`lingman, bayotim o`zing,  
Tilimning ostida novvotim o`zing,  
Bag`rim, jonim o`zing, hayotim o`zing,  
Dil torim qalampirmunchoqlaringda.

Qizg`aldoqzoringda ko`milib yotdim,  
Billur shabnamlarda cho`milib yotdim,  
Dunyoni unutdim, o`zni yo`qotdim,  
Men ham vatan bo`ldim quchoqlaringda!



## Diyorim

Diyorim, dunyoning xaritasida  
Tulpordek o`ynoqlab turgan diyorim.  
Samoning miltiroq darichasida  
Saodat shu`lasin ko`rgan diyorim,  
O`shal yulduzingdan adashtirmasin,  
O`zbegin, o`zingdan adashtirmasin!

Nima ko`p, olamda fitna-nayrang ko`p,  
Birovning dardidan quvonch, bayram ko`p.  
Ko`rgan kunlaringni maysalar aytsin,  
Ko`z yoshing ko`pmidi yoki shabnam ko`p.  
Shul dala-tuzingdan adashtirmasin,  
O`zbegin, o`zingdan adashtirmasin!

Dunyo deganlari g`avg`oli dunyo,  
Aldoqchi va g`irrom savdoli dunyo.  
Muhtojga berolmas, borni ko`rolmas,  
Navoiy aytgandek, “yag`moli dunyo”.  
Teran ildizingdan adashtirmasin,  
O`zbegin, o`zingdan adashtirmasin!

Ming shukr, yuragi oftoblaring bor,  
Olamni qaratgan xitoblaring bor.  
Baho bergan xudo daholam ham bergan,  
Ulug` zot silagan kitoblaring bor.  
Tabarruk izingdan adashtirmasin,  
O`zbegin, o`zingdan adashtirmasin!

## Navro`z qo`shig`i

Bahorni bilmagan ellarni ko`rdim,  
Bir chechak kulmagan yerlarni ko`rdim.  
O`zingni sog`inib keladi navro`z,  
Kaftingga ko`z suray, dehqonim, yurtim,  
O`zingdan o`rgulay, bog`bonim, yurtim.

Chuchmoma chayqalib, chalar qo`ng`iroq,  
Hayot hidin sochar uyg`ongan tuproq,  
Ildiz suvratini chizadi chaqmoq,  
Kaftingga ko`z suray, dehqonim, yurtim,  
O`zingdan o`rgulay, bog`bonim, yurtim.

Mehmonni chorlaydi sumalaklaring,  
Qizlaring bog`laydi jamalaklarin.  
Saodatga ko`prik kamalaklaring,  
Kaftingga ko`z suray, dehqonim, yurtim,  
O`zingdan o`rgulay, bog`bonim, yurtim.

Ey, kafti qadog`-u ko`ngli yumshoq el,  
Quyoshda qoraygan, yuragi oq el,  
Duoga qo`l ochgan, tilagi oq el,  
Kaftingga ko`z suray, dehqonim, yurtim,  
O`zingdan o`rgulay, bog`bonim, yurtim.

Muqaddas yering bor, qutlug` osmon bor,  
Suyangan tog`ing bor, dilda iymon bor.  
Ulug` bog`istonga buyuk bog`bon bor,  
Kaftingga ko`z suray, dehqonim, yurtim,  
O`zingdan o`rgulay, bog`bonim, yurtim.

## **Qaram bo`lmas o`zbek**

Egasiz va oyoqosti yo`lmas o`zbek,  
Xohlagan suv oladigan ko`lmas o`zbek.  
Dong taratgan va o`ziga qaratgan el,  
Hech qachon hech kimga qaram bo`lmas o`zbek.

Vatangado, yurtfurushlar anglamaslar,  
Oltinday sof hikmatlar hech zanglamaslar.  
Ona hamda Vatanni-ku tanlamaslar,  
Hech qachon hech kimga qaram bo`lmas o`zbek.

Borgan joyin obod qilgan Boburlari,  
Mazlumlarni ozod qilgan Temurlari.  
Tog`lardan ham balandroqdir g`ururlari,  
Hech qachon hech kimga qaram bo`lmas o`zbek.

O`g`il-qizlar shiddati-yu shashtini ko`r,  
Birovga bosh egmaslikning gashtini ko`r.  
Yurak bo`lsa, ringga chiqib mushtini ko`r,  
Hech qachon hech kimga qaram bo`lmas o`zbek.

Yaratgandan boshqasiga qulmas o`zbek,  
Hech kimdan kam bo`lmagan, kam bo`lmas o`zbek.  
Dong taratgan va o`ziga qaratgan el,  
Hech qachon hech kimga qaram bo`lmas o`zbek.

## Vatan

Seni desam yuragimda  
ochilar gullar,  
Yomg`ir bo`lib samolardan  
sochilar gullar,  
Sahrolardan, daryolardan  
sochilar gullar,  
Yuragimning gulisan sen,  
gullagan Vatan!

Isming aytib uyg`onadi  
chuchuk jilg`alar,  
Sunbulalar tonglaringdan  
taqar sirg`alar,  
Kiprigimda yog`dularing  
solar jilvalar,  
Tilagimning gulisan sen,  
gullagan Vatan!

Xushbo`y-xushbo`y olmalarda  
jannat havosi,  
Tog`laringning bag`rida ming  
dardning davosi,  
Shudir, axir, bir insonning  
umr safosi,  
Yuragimning gulisan sen,  
gullagan Vatan!

Hovuch-hovuch, zilol-zilol  
suingdan ichdim,  
Mehrining qanot bo`ldi, moviy  
ko`klarda uchdim,  
Yana qaytib senga keldim,  
tuproq`ing quchdim,  
Tilagimning gulisan sen,  
gullagan Vatan!

... Yuraginning gulsan sen,  
gullagan Vatan!

## **Bu Vatan muqaddas**

Bu Vatan muqaddas,  
Bu Vatan mo`tabar.  
Har maysa, har bir xas  
Tabarruk shu qadar:

Temurbek shiddati,  
Orzusi, niyati,  
Davroni shundadir,  
Arkoni shundadir.

Or to`la qalbimiz,  
Buzilmas safimiz.  
Yurtimiz – sajdagoh,  
Qiblagoh – xalqimiz!

Ey o`g`lon, ey shunqor,  
Bo`l xushyor – quzg`un bor.  
Asraymiz Vatanni,  
Yurtboshi madadkor!

Sen mardi maydon bo`l,  
Elingga qalqon bo`l.  
Vatanning – onangdir,  
Vatanga posbon bo`l!

Bu Vatan azizdir,  
Bu Vatan muqaddas.  
Timsoli yo`q uning,  
Qiyosi topilmas.

Safga tur, ey o`g`lon,  
Olg`a yur, ey o`g`lon.  
Mardlari bor Vatan  
Yuksalur, ey o`g`lon!

## **Elim desam**

Elim desam, tilginam  
Sayron bo`lgani bo`lgan,  
Yurtim desam, dilginam  
Xandon bo`lgani bo`lgan.

Chamanimning chiroyi –  
Guloftobi, guloyi.  
Yuragimning bir joyi  
Rayhon bo`lgani bo`lgan.

Dalalashib, qirlashib,  
Boshni qo`shib sirlashib,  
Sarkash soylar birlashib  
Ummon bo`lgani bo`lgan.

Havoda tek turgaylar,  
Chechakka to`sh urgaylar,  
Gulni ko`rgan to`rg`aylar  
Xushxon bo`lgani bo`lgan.

Ortda qoldi ne g`ovlar,  
Sina-sina, sinovlar,  
Shashtim ko`rib anovlar  
Hayron bo`lgani bo`lgan.

Qadr topdi-ku qadrim,  
Havoga to`ldi bag`rim,  
Yurtboshim bergan davrim  
Davron bo`lgani bo`lgan.

## **Yurtim jamoli**

Quyosh maftun, oy shaydo,  
Oshiq hatto shamoli.  
Bunday joziba qayda?  
Oh, yurtim jamoli!

Giyoh-u guli go`zal,  
Gulidan eli go`zal,  
Elining dili go`zal,  
Oh, yurtim jamoli!

Osiyoning markazi,  
Bu dunyoning markazi,  
Yer samoning markazi,  
Oh, yurtim jamoli!

Bir tarafda yallalar,  
Bir tarafda allalar,  
Guzarlar, mahallalar –  
Oh, yurtim jamoli!

Piyolada ko`kchoyi,  
Mehmonga to`ri – joyi,  
Yashnab borar chiroyi –  
Oh, yurtim jamoli!



## **Ey ona yurt**

Toleimda yo`llar ko`rdim men,  
Dunyo kezdim, ellar ko`rdim men.  
Alvon-alvon gullar ko`rdim men,  
Tarovating ko`rmadim biroq,  
Ey ona yurt, ey aziz tuproq.

Hamma narsa bordir xorijda,  
Temir minor ko`rdim Parijda.  
Laylaklar yo`q, yo`qdir farishta,  
Qaldirg`oching ko`rmadim biroq,  
Ey ona yurt, ey aziz tuproq.

Zo`ring bo`lsa, osmon mohtobli,  
Zaring bo`lsa, zamon oftobli.  
Tuyg`ulari hisob-kitobli,  
Oqibatni ko`rmadim biroq,  
Ey ona yurt, ey aziz tuproq.

Mehmon yo`qdir bunda, mezbbon yo`q,  
Qoraqozon yo`qdir, qumg`on yo`q,  
Sovchilar yo`q, to`ydasturxon yo`q.  
Muhabbatni ko`rmadim biroq,  
Ey ona yurt, ey aziz tuproq.

Izlaganim o`zingda, xalqim,  
Quyosh kulgan ko`zingda, xalqim,  
Bahoring bor kuzingda, xalqim,  
Yuragi gul, tilagi oppoq,  
Ey ona yurt, ey aziz tuproq.

## **Armiya bilan xalq**

Askar safda borar: bir, ikki, uch!  
Tuproq`i zar yurtim, tog`lari marjon.  
Birlik, yakdillikda eng qudratli kuch –  
Armiya bilan xalq bir tan-u bir jon!

Sheryurak bobolar hayoti o`rnak,  
Saodat – Vatanga bo`lmoqlik o`g`lon.  
Gar fido bo`lmasang jon nega kerak,  
Armiya bilan xalq bir tan-u bir jon!

Zirrilaydi zamin tashlasam qadam,  
Na`ra tortsam qalqib ketadi osmon.  
Tinchlik barqarorki, har bir kun bayram  
Armiya bilan xalq bir tan-u bir jon!

Oq yuvib, oq tarab o`sdirding, ona,  
Meniki, bizniki bu qutlug` makon.  
Temuriy voris bor, el bor yagona,  
Armiya bilan xalq bir tan-u bir jon!